

Акафист Пресвятой Богородице в честь иконы Ея «Целительница»

Празднуем 18 сентября/1 октября

Кондак 1

Избранней от всех родов Пресвятей Деве Богородице, явившейся некогда клирику болящу во еже исцелити его от болезни лютыя, похвальное приносим пение. Ты же всемилостивая Владычице, яко имущая державу непобедимую, от всяких бед и скорбей и болезней свободи ны зовущия Ти:

Радуйся, Благодатная, целительнице душ и телес наших.

Икос 1

Архангел Гавриил, возвещая Пресвятей Деве Марии безсеменное зачатие от Нея Сына Божия, рече: «Радуйся, Благодатная, Господь с Тобою, благословенна Ты в женах», мы же, грешнии, гласу Архангела подражати дерзающе с верою и любовью, и благоговением вопием пренепорочней Богородице хвалебная пения сицевая:

Радуйся, от начала веков во главу нашего спасения предъизбранная; радуйся, многообразне от пророк предвозвещенная. Радуйся, Невесте невестная, заченшая Сына от Духа Святаго; радуйся, Мати в рождестве и по рождестве пребывшая Дево. Радуйся, Одеющагося светом яко ризою, пеленами повившая, радуйся, млеко питавшая горняя и дольняя благодатию Своею Питающаго. Радуйся, на руку Твоею носившая Вседержителя; радуйся, о Промыслителе всея твари попечение имевшая. Радуйся, паче всех Сына Твоего возлюбившая; радуйся, паче всех от Него превознесенная. Радуйся, честнейшая и славнейшая без сравнения всех небесных сил; радуйся, превышшая всякаго создания.

Радуйся, Благодатная, целительнице душ и телес наших.

Кондак 2

Видящи, преблагая Владычица, усердие и благоговение клирика Викентия, на всяк день преклоняющаго колена пред честным Твоим образом и архангельское приветствие Тебе приносящаго, приняла еси таковое его благоугождение и даровала еси ему во дни болезни внезапное и дивное со одра востание. Тем же и мы преклоняем колена душ и телес наших пред цельбоносным Твоим образом, Госпоже наша Богородице, и, поминающе чудное явление Твое клирику болящему, вопием Сыну Твоему и Богу нашему: Аллилуия.

Икос 2

Разумев чудесное исцеление от тяжкого недуга, клирик Викентий, воста с убогого ложа своего, иде в церковь и тамо песньми хвалебными прослави Тя, Целительницу всех болящих. Приими убо и от нас, Мати Божия, сии благохваления:

Радуйся, от врат смертных неисцельно болящих к жизни возвращающая; радуйся, сострадания к страждущим преисполненная. Радуйся, пораженных различными недуги чудесно исцеляющая; радуйся, во всяких скорбех и печалех небесную отраду в сердца наша изливающая. Радуйся, в христианских добродетелях преуспети нам помогающая; радуйся, любовь к Богу и ближним нас одушевляющая. Радуйся, от растлевающих душу и тело соблазнов мира сего сохраняющая; радуйся, скорая услышательнице усердно Тебе молящихся. Радуйся, источающая великия милости и щедроты любящим Тя; радуйся, уповающим на Тя вся потребная в животе сем дарующая. Радуйся, ублажающих Тя в грозный час смерти не оставляющая; радуйся, почитающих Тя жизни вечныя сподобляющая.

Радуйся, Благодатная, целительнице душ и телес наших.

Кондак 3

Силою, данною от Тебе, Госпоже Царице и Владычице, святая икона Твоя источает неоскудно исцеления страждущим от недугов многоразличных, с несумненною верою к ней притекающим, Богу же вопиющим: Аллилуия.

Икос 3

Имущи премногую любовь к роду христианскому и Матернее о нем попечение, всем просящим у Тебе помощи и заступления, всякое прошение скоро исполняеши; сего ради Тебе всемогущей Заступнице и скорой Помощнице нашей приносим похвалы сия:

Радуйся, скорбящих утешение; радуйся, безнадежных надеждо. Радуйся, труждающихся помощи и укрепление; радуйся, нищих одеяние. Радуйся, алчущих питательнице; радуйся, обидимых и гонимых заступнице. Радуйся, обидящих устрашительнице; радуйся, в христианской вере наставнице. Радуйся, споручнице спасения грешных; радуйся, взыскание погибших.

Радуйся, Благодатная, целительнице душ и телес наших.

Кондак 4

Бури страстей и похотей искушений бесовских избави нас, премилосердная Богородице, укрепи и сохрани в нас до конца жизни наша веру православную и преданность Святей Церкви, да возможем

невозбранно пети Господу Богу: Аллилуия.

Икос 4

Слыша Господь на небеси Твоя о нас моления, преблагая Владычице, исполняет скоро всякое прошение Твое. Ведуще таковое Матернее дерзновение к Сыну Твоему, Господу нашему Иисусу Христу, вси к Тебе прибегаем и усердно молим Тя: предстательствуй за нас, многогрешных рабов Твоих, пред всемогущим Создателем нашим, да не погубит нас со беззаконными нашими, но да подаст нам оставление прегрешений, вопиющим Тебе из глубины души:

Радуйся, предстательнице пред Богом мир от бед спасающая; радуйся, Сына Твоего на милость к нам недостойным преклоняющая. Радуйся, от запаления огненного росю молитв Твоих избавляющая; радуйся, удары молнии и грома от главы нашея отводящая. Радуйся, юродивую мудрость века сего посрамляющая; радуйся, путь истины заблуждающим показывающая. Радуйся, грешным к Богу дерзновение дарующая; радуйся, изнемогающим в напастех, скорбех и искушениях скоро помогающая. Радуйся, в посте и молитве и богомыслии пребывающим присно спребывающая; радуйся, блага земная, суетная и скоропреходящая, презирати нас научающая. Радуйся, к небесным и вечным сокровищем умы и сердца наша возводящая; радуйся, единое на потребу избирати научающая.

Радуйся, Благодатная, целительнице душ и телес наших.

Кондак 5

Свет небесный озари храмину болящего клирика, егда предстала еси, преблагая Владычице, даровати ему исцеление от лютого недуга. О Пресвятая Госпоже Богородице, просвети помраченныя многими грехми души наша и подаждь исцеление болезнующим телесем нашим, да, прославляюще милости Твоя, вопием радостно Богу: Аллилуия.

Икос 5

Видяще Тя, Владычицу Богородицу, пред огнезранным престолом Пресвятыя Троицы стоящу и за христиан молящуюся, небесныя силы и вси святии, от века Богу угодившии немолчными славословиями ублажают Тя. Мы же грешнии на земле, любовь к Тебе подвизаемии дерзаем воспевати Тебе сице:

Радуйся, Матернею любовью весь мир христианский объемлющая; радуйся, всех верных благая заступнице. Радуйся, изрядная споборнице ведущим брань противу искушений мирских и душевредных; радуйся, от всякия злобы и вражды миром и любовью ограждающая. Радуйся, всех прибегающих под кров Твой приемлющая;

радуйся, наставнице целомудрия и воздержания. Радуйся, подвижников благочестия к горнему Иерусалиму путеводительнице; радуйся, душепагубных ересей и расколов искоренительнице. Радуйся, скорая в бедах и печалех утешительнице; радуйся, молитвеннице наша пред Сыном Твоим и Богом.

Радуйся, Благодатная, целительнице душ и телес наших.

Кондак 6

Проповедует Святая Православная Церковь множество чудес Твоих и великия Твоя милости, преблагая Владычице, яко грады и веси ограждаеши, обители иноческия и жилища благочестивых рабов защищаеши, обидимых заступаеши, и вся благая и душеполезная ниспосылаеши всем прославляющим Тя и поющим Сыну Твоему: Аллилуия.

Икос 6

Светло красуется zde, Госпоже Богородице, чудотворная Твоя икона именуемая Целительница, прогоняющи от всех верных тьму искушений и напастей и обильно исцеления источающи. Сего ради со умилением зовем Ти:

Радуйся, от неисцельных болезней скорое исцеление подающая; радуйся, от всяких скорбей и бед избавляющая. Радуйся, греховныя страсти укрощающая, радуйся, колеблющихся в вере православней укрепляющая. Радуйся, утешение благодатное изливающая в сердца боголюбивыя; радуйся, надеждою небесных благ верных души улаждающая. Радуйся, в добрых делах преуспевати нам помогающая; радуйся, от видимых и невидимых враг нас защищающая. Радуйся, благодатию Твоею падших возставляющая; радуйся, страх Божий в сердца наша вселяющая.

Радуйся, Благодатная, целительнице душ и телес наших.

Кондак 7

Хотящи явити милосердие Твое неизреченное, даровала еси нам, преблагая Богородице Дево, чудотворную икону Твою, именуемую Целительница, да вси притекающи к ней с верою от болезней свободдаются и всякаго утешения сподобляются. Сего ради вопием о Тебе Богу; Аллилуия.

Икос 7

Дивна и преславна дела Твоя, пренепорочная Владычице, всем бо богатым и нищим, здоровым и болящим, и с прилежною молитвою пред цельбоносною Твоею иконою притекающим, вся благая по коегождо

потребе и в меру веры и любви подаеши. Темже и мы не таим Твоих благодеяний, но благодарственно прославляюще милости Твоя глаголем Ти сице:

Радуйся, глухих слышание; радуйся, слепых прозрение. Радуйся, немых глаголение; радуйся, хромых хождение. Радуйся, прокаженных очищение; радуйся, расслабленных укрепление. Радуйся, от злых и лукавых духов свобожделение; радуйся, по Бозе наше прибежище и заступление. Радуйся, от нужд, и печалей, и бед непреложное избавление; радуйся, пристрастие к тленному богатству искореняющая. Радуйся, искати богатство нетленное на небеси научающая; радуйся, ум наш в горня вперяющая.

Радуйся, Благодатная, целительнице душ и телес наших.

Кондак 8

Странники и пришельцы в мире сем скорбнем и многмятежном суще, вечнаго небеснаго отечества взыскуем и Тебе всемогущую Царицу, Приснодеву Богородицу, смиренно просим: путеводи нас по стезям спасительных заповедей Сына Твоего, Христа Бога нашего, да избегше сетей невидимаго врага, возможем невозбранно воспевати Вседержителю Богу песнь: Аллилуия.

Икос 8

Весь мир христианский ублажает Тя, пренепорочную Деву, гласы хвалебными, всем бо верным, наипаче же болящим утешительно есть взирати на всечестную икону Твою, Целительницею именуемую. О, пречудная Госпоже Богородице, прими и наша умиленная благохваления таковая:

Радуйся, радости наша; радуйся, доброта несказанная. Радуйся, высоту добродетелей; радуйся, глубину смиренномудрия. Радуйся, неистощимый источнице милостей и щедрот, радуйся, благоуханный цвете девства и чистоты. Радуйся, веры христианския утверждение; радуйся, нечестия обличение. Радуйся, горних сил похвало; радуйся, всех праведных славо. Радуйся, всех грешных упование; радуйся, ненадеемых надеяние.

Радуйся, Благодатная, целительнице душ и телес наших.

Кондак 9

Все упование на Тя возлагаем, Мати Божия, и в скорбех и болезнях ко святой иконе Твоей с благоговением и верою притекаем, чающе от Нея скорое утешение и исцеление получитьи. О, Пресвятая Царице Богородице, возри милостивно на нас смиренных рабов Твоих и ускори исполнити вся, яже на пользу нам, и в сей жизни и в будущей.

Да прославляюще Твое благоутробие, воспеваем Творцу Богу: Аллилуия.

Икос 9

Ветии многовещаннии не возмогут достойно восхваляти Тя, Пречистую Деву честнейшую Херувим и славнейшую без сравнения Серафим, безсеменно рождшую Спаса душ наших. Мы же, аще и немощни есмы, обаче любовью к Тебе побеждаеми, отверзаем недостойныя уста своя на похвалы Тебе сицевыя:

Радуйся, умы человеческими и ангельскими непостижимая тайно: радуйся, чудес Христовых начало. Радуйся, всех пророчеств исполнение; радуйся, чистотою Ангелов превосшедшая. Радуйся, девство и рождество в Себе чудно сочетавшая; радуйся, в обою непорочно и свято себе сохраняя. Радуйся, Мати Сына Божия и Бога Вышняго; радуйся, падшему человечеству отверзшая вход в царствие горнее. Радуйся, тихое пристанище от бурь плавающих по морю житейскому; Радуйся, Богом дарованная отрадо страждущим. Радуйся, сияющая благодатию и славою предивных знамений и чудес; радуйся, приемлющая похваления людских словес.

Радуйся, Благодатная, целительнице душ и телес наших.

Кондак 10

Спасти хотяй весь род человеческий от беззаконий и вечныя муки, человеколюбец Господь Тя, Матерь Свою, дарова в помощь, покров и защиту верующим в Него. Прославляюще таковое Создателя нашего безмерное милосердие о нас, грешных, благодарственным сердцем и устны вопием Ему: Аллилуия.

Икос 10

Стена еси необоримая и заступления крепкое, Богородице Дево, всем с молитвою к Тебе прибегающим. Темже убо и нас, недостойных, огради от лютых болезней и от всякаго злаго обстояния и подаждь во всех делех благовременную помощь и укрепление взывающим Ти:

Радуйся, заступнице наша и похвало; радуйся, хранительнице наша и утверждение. Радуйся, отрадо наша и дивное о нас попечение; радуйся, известное прибежище наше во всех скорбных обстояниях. Радуйся, младенцев воспитание: радуйся, юных наставнице целомудрия. Радуйся, супругом любовь и согласие дарующая; радуйся, благоговейных старцев к мирной кончине жития приводящая. Радуйся, верных пастырей Святыя Церкви укрепляющая и вразумляющая; радуйся, в иноческом образе подвизающимся ходатаице вечнаго радования. Радуйся, и в мире благочестиво живущих неоставляющая

Своим заступлением; радуйся, всем христианом предивное вспоможение.

Радуйся, Благодатная, целительнице душ и телес наших.

Кондак 11

Пения и мольбы всеумиленные, ныне нами приносимыя пред цельбоносным Твоим образом, приими Приснодево Богородице, и сподоби до конца жизни наша Единому Богу воспевати: Аллилуия.

Икос 11

Светозарне сияет чудотворная икона Твоя, Мати Божия, источающи верным токи исцелений благодатных, наставляющи блуждающим во тьме грехов на светлый путь добродетелей и спасения. Сего ради вопием Ти хвалебныя песни таковая:

Радуйся, осенением Твоея иконы силу вражию от всех прогоняющая; радуйся, всем прибегающим в скорбех и нуждах и болезнях скорое утешение и исцеление подавающая. Радуйся, чудо чудес, Одигитрие Владычице, на путь спасения наставляющая; радуйся, мирное устройство обуреваемым напастями дарующая. Радуйся, чистотою Твоею чистому житию нас научающая; радуйся, лукавых, гордых и гневливых людей вразумляющая. Радуйся, правую веру и страх Божий в нас вселяющая; радуйся, светом Христова учения тьму неверия прогоняющая. Радуйся, смущение помышлений сумнительных удаляющая; радуйся, всех духовных даров щедрая подательница. Радуйся, благочестия наставнице; радуйся, мира ходатаице.

Радуйся, Благодатная, целительнице душ и телес наших.

Кондак 12

Благодатию и щедротами Твоими, премилосердная Владычице, не оставляеши христиан православных, дарующи скорбящим утешение, обидимым заступление, болящим исцеление и всем сущим в бедах многоразличных избавление. Сего ради прославляюще Тя благодарственно вопием Богу: Аллилуия.

Икос 12

Поюще Твоя неизреченныя милости и чудеса, являемыя нам недостойным, преклоняем колена перед цельбоносным Твоим образом, Богородице Приснодево, и молим Тя усердно: подаждь нам мир, тишину и благу кончину и не остави без Твоя помощи и заступления во втором пришествии Сына Твоего и Бога нашего всех приносящих Ти со умилением сия похвалы:

Радуйся, в уныние и отчаяние впадших, надеждою спасения

укрепляющая; радуйся, узы греховныя разрешающая. Радуйся, праведный на нас гнев Божий на милость прелагающая; радуйся, земное житие наше добре устрояющая. Радуйся, от опасных обстояний нас избавляющая; радуйся, в час кончины всем верным скорая помощнице. Радуйся, чтущих Тя на мытарствах воздушных заступающая; радуйся, любовь к Тебе имущим врата райская отверзающая. Радуйся, прославляющих Тя вечнаго блаженства в Царствии Небеснем сподобляющая, радуйся, не чтущих Тя перед всеми посрамляющая. Радуйся, державная скоропомощница наша во дни тяжких испытаний; радуйся, яко во дни светлыя нам сорадуешься.

Радуйся, Благодатная, целительнице душ и телес наших.

Кондак 13

О Всепетая Мати сладчайшего Господа нашего Иисуса Христа, милостивно прими сие малое моление наше, избави нас от всякия напасти, болезни и внезапныя смерти и сподоби нас наследники быти Царствия Небеснаго и со всеми святыми воспевати Сыну Твоему и Богу нашему: Аллилуия.

(Этот кондак читается трижды, затем икос 1 и кондак 1)

Молитва

О преславная Госпоже Царице Богородице, высшая всех небесных сил и святейшая всех святых! Припадаем и поклоняемся Тебе пред всечестным и цельбоносным образом Твоим, воспоминающе дивное явление Твое болящему клирику Викентию, и усердно молим Тя, всеильную рода нашего заступницу и помощницу: якоже древле подала еси исцеление тому клирику, тако и ныне исцели наша души и телеса, болезнующия ранами грехов и страстей многоразличных, избави нас от всяких напастей, бед, скорбей и вечнаго осуждения. Сохрани от душепагубных лжеучений и безверия, от лживых и наглых нападений невидимых врагов, подаждь нам христианскую кончину, безболезненну, мирну, непостыдну, Святых Тайн причастну. Сподоби нас ходатайством Твоим на страшном нелицеприятном Судищи Христове стати одесную всеправеднаго Судии и блаженный глас Его услышати: «Приидите, благословеннии Отца моего, наследуйте уготованное вам царствие от сложения мира». Аминь.